

1. 香港有唔少搞笑藝人，最經典嘅有黃子華、張達明，亦有近年彈起嘅組合Error。另外，有啲搞笑藝人會做「棟篤笑」(Stand-up comedy)，即係喺台上以獨角戲方式表演嘅喜劇，題材環繞日常生活趣事或社會、政治現象，類似中國嘅單口相聲。
2. 形容某個人唔怕醜、唔怕癩，做事唔理其他人睇法，甚至有廉恥，我哋可以話佢「厚面皮」。誇張啲嘅，仲可以用「面皮幾尺／吋厚」嚟加強嗰個人厚面皮嘅程度。
3. 「侏儒」泛指身材好短小，但智力同身體發育都正常嘅人。
4. 「屎橋」即係冇乜建設性嘅提議，做嚟都晒氣。「屎」係形容能力或啲嘢質素差，例如「屎波」即係球技差。而「橋kiu2」可以解做辦法、提議、主意等。
5. 「燉冬菇」、「炒魷魚」呢兩樣都唔係真正嘅菜式。「燉冬菇」其實係解俾人眨咗去相對低級或差嘅職位；「炒魷魚」係指終止僱傭關係，直接用即係俾老闆辭退(如果係員工辭職，就叫「炒老闆魷魚」)。再簡單啲嘅講法，就係俾人「燉咗」或「炒咗」。
6. 去食自助餐，食得落先好攞，唔好「眼闊肚窄」——見到好味嘅食物就想繼續食，點知個肚已經飽咗而食唔落，浪費食物。
7. 「照肺」除咗解胸腔嘅X光檢查，同時亦解做俾上司訓話。例句：「佢唔小心喺份報告度打少咗個零，實俾老細照肺喇！」
8. 一個怕得罪老婆、愛錫老婆嘅男人，我哋會叫佢做「老婆奴」，正面嚟講係讚佢好顧家。另外有句俗語係「怕老婆會發達」，認為愛錫老婆嘅老公會行好運。
9. 我哋會用「賣花讚花香」嚟形容啲人自己讚自己賣嘅貨或者自己完成嘅工作。
10. 要讚一個人思維跳脫、腦筋快，我哋可以話佢「轉數快」。另外，香港有一個電子支付平台都係用「轉數快」嚟命名，有方便快捷嘅寓意。

by 綠柚子